

JISŌS EAR JERKAKPEJE IM WANLŌÑŁŌK

Köttōpar ko an katak in:

- Kwaļok bwe Jisōs ear jerkakpeje ilo raan eo kein ka jilu.
- Kwaļok bwe jerkakpeje eo an Jisōs ej kwaļok bwe E Nejin Anij.
- Kwaļok bwe jerkakpeje eo an Jisōs ej kwaļok bwe Anij e jokwane kōn mej an Jisōs.
- Kwaļok bwe Jisōs ear kōļļā oņean aolep jerōwiwi ko ad.

Meļeļe ko reļap ilo katak in:

- Jen lo bwe Jisōs ear jerkakpeje im kaṃool bwe E Nejin Anij.
- Jen lo bwe Anij e jokwane kōn mej eo an Jisōs.
- Jen lo bwe jej aikuj tōmak bwe mej an jerkakpeje an Kraist e bwe ñan kōj.
- Jen lo bwe Jisōs ear ba bwe Enaaj bar itok juon raan.


E ṃool aolep men ko jej read ilo Bible. Ilo Bible Anij ej kwaļok ñan kōj kōn plan im karōk eo An ñan loṃooren armej. Jān jinoin Bible jej lo wānōk an Anij im ban an armej. Bōtab joñan an Anij kajoor, māļōtlōt, im yokwe, Ear lo juon wāween loṃooren armej jān jerōwiwi, Setan, im mej indeeo. Ear jilkintok Nejin, Jisōs, bwe En mej kōn kōj im kōļļā aolepen oņean jerōwiwi ko ad. Bōtab Jisōs ear jab pād wōt im mej. Ear jerkakpeje.

1. Jet kōrā raar etal ñan lōb eo.

Jisōs ear mej, im raar kalbwīn E. Ear pād ilo lōb eo iuṃwīn 3 raan im 3 boñ. Innām ilo jibboñ ilo raan eo ṃokta ilo wiik (Sunday, ak ilo Majel armej rej ba Jabōt), jet iaan liṃaro me raar tōmak ilo Jisōs raar etal ñan lōb eo.



Luk 24:1 A ilo raan eo ṃokta ilo wiik, ke e raantak, rej ilok ñan lōb eo, im bōktok toļaj ko raar kōpooji.



Ekkar ñan ṃanit ko aer, liṃaro raar bōktok jet toļaj ko, men ko reñaj, bwe ren likūti ioon ānbwīnnen Jisōs. E kar ṃokaj aer kalbwīn Jisōs kōnke epaak Jabōt eo (Saturday) im Kwōjkwōj in Kijoone. Kōn men in, liṃaro raar kattar ñan raan eo kein ka juon ilo wiik bwe ren bōktok toļaj ko. Bōtab, raar kanooj bwilōñ.



Luk 24:2 Im rej lo ejṃaan eo e dāpiļok jān lōb eo.

Raar jab jeļā bwe eṃōj an Anij jilkintok juon enjeļ bwe en kadāpiļok dekā eo e kilep jān mejān lōb eo ijo ānbwīnnen Jisōs ear pād ie.

Eļāñne kwōj etal ñan Israel rainin, kwō maroñ lo jet lōb kain in. Raar jeke juon roñ, āinwōt juon ruuṃ, ilo dekā ilo tōrerein juon bat. Innām raar kiili lōb eo kōn juon dekā ekilep.

2. Naan ko jān enjeļ ro.



Luk 24:3,4 Im rej deļoņ ilowaan, im jab lo ubōn Irooj Jisōs. Im ke eļap aer pere kake, lo, ruo armej rej jutak itureir, ilo nuknuk ko re jatōltōl:

Ānbwinnen Jisōs ear jab pād ilo lōb eo! Kab, ruo enjeļ raar pād ie im kōnono ippān kōrā ro.



Luk 24:5-7 Im ke rej lōļņoņ, im jirļok mejeir ñan bwidej, rejro ba ñan er, “Etkē koņij pukot eo E mour, ippān ro re mej? [6] E jab pād ijin, a eņōj An jerkakpeje: koņwin keememej kōjkan An kōnono ñan koņ ke Ear pād wōt i Galili, [7] Im ba, ‘Nejin armej, naaj ketak E ilo pein armej re nana, im naaj debwāļ E, im ilo raan eo kein ka jilu Enaaj jerkakpeje.’”

Eņōj an Jisōs jerkakpeje āinwōt An kar ba Enaaj kōmmane.

* **Jisōs ej Anij.**

- Ear itok ñan laļ in im erom armej bwe En lōmoņoren kōj jān Setan, jerōwiwi, im mej.
- Ear jeļā mokta jān An itok jān lañ bwe Enaaj aikuj mej kōn kōj.
- Ear barāinwōt jeļā bwe Enaaj jerkakpeje im jab bar mej indeeo.



Sam 16:10 Bwe Kwō jāmin likūt aō ilo Sheol; im Kwō jāmin likūt Eo Aņ bwe En lo kōt.

Devid ear ba bwe Ri Lōmoņor eo enaaj jerkakpeje, im e kar tōprak.



Luk 24:8-12 Im rej keememej naan ko An, [9] Im jeļlaak jān lōb eo, im kwaļok men kein otemej ñan joņoul im juon, im ro jet otemej. [10] Meri Magdalini, im Joanna, im Meri jinen Jemes, im bar jet kōrā ippāer, ro raar kwaļok men kein ñan ro ri jeļōk. [11] Im naan kein rej waļok ñan er āinwōt naan waan, im re jab tōmak er. [12] A Piter e jutak im ettōr ñan lōb eo: im ke ej jirļok, ej lo nuknuk linen ko make iaer, im ej ilok ñan jikin, im bwilōñ kōn men eo e ar waļok.

Aolep ro rū kaļoran Jisōs ren kar jeļā men in im katmāne bwe Enaaj jerkakpeje. Eņōj an Jisōs kōnnaanōk er kōn men in, im ren kar pojak in kattar E. Bōtab, raar jab meļeļe im tōmak. Ak Anij ej kōmman men ko Ej ba jekdoņ ta.

3. Jisōs ej Nejin Anij.

Je jeļā bwe Jisōs ej Nejin Anij im Ri Lōmoņor eo me eņōj kallimur kake kōnke Anij ear kajerkakpeje E jān ro re mej. Ro ri utiej iaan ri Ju ro raar man Jisōs kōn An kar ba bwe E Nejin Anij, Ri Lōmoņor eo. Bōtab Anij ear kajerkakpeje Jisōs bwe aolep ren jeļā bwe e mool naan ko an Jisōs, im E Nejin Anij.

4. E jokwane Anij kōn kōļļā eo an Jisōs.

Je jeļā bwe Anij ear mōņoņo im jokwane kōn kōļļā eo an Jisōs kōn jerōwiwi ko ad.

Mokta jān an Jisōs mej, Ear laņōj im ba, “Eņōj.” Anij ear potak rōņel nuknuk eo ilo tempel eo jān

lōñ ñan laļ. Anij ear kōmman men in ñan kwaļok bwe e peļļok iaļ ñan E kiiō. Bōtōktōken Jisōs ear kapelļok iaļ ñan kōllaajrak armej ñan Anij.

Ke Anij ear kajerkakpeje Jisōs jān ro re mej, ej kwaļok bwe Anij ear jokwane kōn mej eo An. Anij e ban kar kajerkakpeje E eļaññe e jab bwe kōļļā eo an Jisōs.

Eļaññe juon armej e kalbuuj im ej ko jān jikin kalbuuj eo mokta jān an uñ raan ko, police rej jibwe e im karōol e ñan jikin kalbuuj eo. Bōtab ñe e uñ raan ko an, im emōj an “kōļļā” kōn nana ko, rej kōtļok e. E kar ejjeļok an Jisōs jerōwiwi, bōtab Ear eñtaan im mej kōn nana ko ad. Kōn an Anij kajerkakpeje Jisōs, Ear kwaļok bwe ejjeļok likjab ilo kōļļā eo. Emōj an Jisōs kōļļā aolepen.



Aiseia 53:11 Enaaj lo tokjān eñtaan eo An, im naaj jokwane; kōn An jeļā kake, Ri Karijera e wānōk enaaj kowānōk elōñ; im Enaaj inekļok jerōwiwi ko aer.

Innām ewi wāween ad mour in ko jān kajoor an jerōwiwi im jān mej indeeo? Jej aikuj kōjatkōdikdik kake Jisōs Kraist ke jej lōke bwe e uñ kōļļā eo kōn jerōwiwi ko ad ke Jisōs ear mej im jerkakpeje.

5. Jisōs ear waļok ñan jet iaan armej me raar ļoor E.



Luk 24:13-24 Im lo, ruo iaer rej ilok ilo raan eo ñan juon jikin kweilok etan Emmeōs, eo jān Jerusalem nañin ruwalitok maiļ. [14] Im rejro kōnono ñan doon kōn men kein otemjej raar waļok. [15] Im ke rej kōnono im bwebwenato ñan doon, Jisōs ej make kepaak, im etal ippāer. [16] A dāpij mejeir bwe ren jab kile E. [17] Im E ba ñan er, “Ta men ko komro kōnono ñan doon, ke kom etal?” Im rej bōjrak im būromōj mejeir. [18] Im juon iaer etan Kliopas, e uwaak im ba ñan E, “Kwe ruwamāejet wōt ilo Jerusalem, im Kwaar jab jeļā men ko re waļok ijo ilo raan kein ke?” [19] Im E ba ñan er, “Men rot?” Im re ba ñan E, “Kōn Jisōs ri Nazeret, eo Ri Kanaan e kajoor ilo jermal im naan iᵇmaan mejān Mejān Anij im armej otemjej: [20] Im kōjkan pris ro reļap im irooj ro am raar ketak E bwe ren liaakļok E ñan mej, im raar debwāal E. [21] A kōm ar katmāne bwe E eo Enaaj lomōoren ri Israel. Aet, im bar jet jān men kein otemjej, rainin raan eo kein ka jilu jān iien eo men kein otemjej kōmmani. [22] Bar juon, jet kōrā iaan jeramiāñ raar kabwilōñ kōm, ro raar pād i lōb eo ke e jibboñ; [23] Im ke raar jab lo ubōn, rej itok im ba, raar lo juon visōn an enjeļ ro, raar ba Ej mour. [24] Im jet iaan ro ippem raar ilok ñan lōb eo, im lo ainwōt kōrā ro raar ba: a re jab lo E.”

Meñe Jisōs ear pād ippaer, raar jab kile E. Innām Jisōs ear kajerbal naan ko ilo Kallimur Mokta ñan katakin er kōn E make.



Luk 24:25-27 Im E ba ñan er, “O armej ri anniabeab im e ruᵇwij būruemi kōn tōmak men ko otemjej ri kanaan raar kōnono kaki! [26] E jab eᵇman bwe ri Kraist en eñtaan kōn men kein, im deļoñ ilo aiboojoj eo An ke?” [27] Im Ej jino ippān Moses im ri kanaan otemjej, im kōmmeļeļeik ñan erro ilo Jeje ko otemjej men ko kōn E make.

Elōñ iien mokta raar mōñā ippān Jisōs, ak kiiō raar kile E.



Luk 24:28-32 Im rej kepaak jikin kweilok eo, ijo rej ilok ñan e: im Ej kōmman ainwōt E kōᵇnaan ilok iᵇmaan ļok. [29] A rejro dāpij E im ba, “Kwōn pād ippem: bwe e jota, im e nañin boñ.” Im Ej deļoñ bwe En pād ippāer. [30] Im ke Ej jibadek in mōñā ippāer, Ej bōk

pilawā, im jar, im ruje, im leļok ñan er. [31] Im e peļļok mejeir, im rej kile E; im E moņon loķ jān er. [32] Im rejro ba ñan doon, “Būrued e jab bwil ilowad ke Ear kōnono ñan kōj ilo ial eo, im ke Ear kōmmeļeļeik Jeje ko ñan kōjro ke?”



Luk 24:35-44 Im rejro kōnnaanōk men ko rej waļok ñan er ilo ial, im kōjkan aer kile E kōn ruje pilawā. [36] Im ke rej kōnono men kein, Jisōs e make jutak eoļōpeir, im ba ñan er, “Aenōmman en ippemi.” [37] A rej mijak im lōļņoņ, im ļōmņak bwe rej lo juon jetōb. [38] Im E ba ñan er, “Etke koņij loķjenaami? Im etke kajjitōk rej waļok ilo būruemi? [39] Koņwin lale peiū im neō, bwe Ņa make: koņwin likūt peimi ioō im lo; bwe jetōb ejjeļok kanniōkin im diin, āinwōt koņij lo Ippa.” [40] Im ke eņōj An kōnono men in, Ej kwaļok pein im neen ñan er. [41] Im ke re jab tōmak kōn lañlōñ, im rej bwilōñ, Ej ba ñan er, “Ewor ke mōttan kijemi ippemi?” [42] Im rej leļok ñan E mōttan ek kōmat. [43] Im Ej bōke im mōñā iņaan mejeir. [44] Im E ba ñan er, “Naan kein naan ko Aō I ar kōnono ñan koņ, ke I kar pād ippemi, bwe eņman ren jejjet men otemjej, men ko ar je ilo kien Moses, im ilo ri kanaan ro, im ilo Sam ko kōn Eō.”

6. Naan ko reliktata an Jisōs ñan ro rū kaļoran.



Luk 24:45-48 Innām Ej kapellōk aer loļātāt, bwe ren jeļā Jeje ko, [46] Im ba ñan er, “Āindein ar je, bwe ri Kraist enaaj eņtaan, im jerkakpeje jān re mej ilo raan kein ka jilu: [47] Im bwe naaj kwaļok ukeļok im jeorļok jerōwiwi ko ilo Etan ñan ri aelōñ otemjej, jinoin jān Jerusalem. [48] Im koņ ri kōnnaan kōn men kein.

Jisōs ear jiroñ ro rū kaļoran im aolep ro rej lōke E bwe ren kwaļok kōn E. Anij e kōņaan bwe aolep armej ren jeļā bwe re maroñ bōk loņoņor jān jerōwiwi im mej. Anij e jab kōņaan bwe jabdewōt armej en mej indeeo.



Jon 3:16 Bwe kōn an Anij yokwe laļ, Ear letok juon wōt Nejin Ear keotak, bwe jabdewōt eo ej lōke E en jab jako, a en mour indeeo.

Unin ad katak Bible ej bwe jen jeļā Naan kein an Anij im kōn pepe im karōk eo An ñan loņoņoren armej.

7. Jej aikuj tōmak Naan in Anij.

Kwōj kememej ke bwebwenato eo kōn Lazarus im ri mweiee? Abraham ear ba ñan ri mweiee eo bwe ro nukun rej aikuj tōmak Jeje ko kōn Kraist eļañne re jab kōņaan mej jān lañ.

Meņe je jab lo Jisōs kiiō, je jeļā kōn E jān Bible. Jej aikuj tōmak news in eņman (gospel) bwe Jisōs wōt E maroñ loņoņoren armej. Āinwōt Abel, Noa, Abraham, im elōñ, Anij e maroñ watōk ad tōmak āinwōt wānōk.

8. Jisōs ear wanlōñļok ñan lañ.

Ke eņōj an Jisōs jiroñ ro rū kaļoran bwe ren kwaļok gospel ñan aolep armej, Ear ilok jān er im wanlōñļok ñan ippān Jemān ilañ.



Jerbal 1:9 Im ke eņōj An kōnono men kein, ke rej kalimjeke, ar bōklōñļok E, im juon kōdo

ej bōk E jān mejeir.



Sam 68:18 Kwaar wanlōñļok ñan jikin e utiej, Kwaar kajipokweik ro ri kajipokwe; Kwaar bōk joortak ko jān ippān armej, aet ippān ro re barāinwōt kapata, bwe Jeova Anij en jokwe ippāer.

E tōprak men ko Anij ear ba kōn Kraist.

9. Jisōs enaaj bar itok.



Jerbal 1:10, 11 Im ke rej kanooj ejjed im kallimjek i lañ ke Ej waan lōñļok, ruo armej rej jutak itureir, e mouj nuknuk ko aer, im re ba, “Koṃ, armej in Galili, etke koṃij jutak im reilok wōt ñan lañ? Jisōs in, Eo eṃōj bōklōñļok jān koṃ ñan lañ, Enaaj itok ainwōt, ilo wāween de in ami lo An ilok ñan lañ.”


Ruo enjel raar kwaļok naan kein. Jisōs enaaj bar itok ñan laļ in juon raan. Bōtab, ñe Ej bar itok, E jab itok bwe En lōmoṃoren armej jān jerowiwī. Enaaj ekajet armej. Anij ej jiroñ armej otemjej bwe ren ukeļok jān nana ko aer kiiō im lōke tokjān mej an Jisōs Kraist. Eļaññe armej re jab lōke Kraist bwe En aer Ri Lōmoṃor, Anij enaaj joļok er ilo loṃalo in kijeek ippān Setan im timoṃ ro an.



Mark 14:61,62 A Ej kejakļokjeṃ im jab uwaak. Pris laļlap eo ej bar kajjitōk Ippān im ba ñan E, “Kwe ri Kraist ke, Nejin Eo E ṃōñōñō?” Im Jisōs e ba, “Ña E; im kwō naaj lo Nejin armej Ej jijet i anmoṃōñ kajoor, im itok ilo kōdō ko i lañ.”



Revelesōn 20:15 Im eļaññe raar lo jabdewōt im kar jab jeje etan ilo bok in mour, raar joļok e ña ilo loṃalo in kijeek.



E alikkar naan in Anij. E ṃool. Jej aikuj lōke Anij ke Ej ba bwe jej ri nana im ri ban, im bwe mej an Jisōs wōt e maroñ kōļļā oṃean jerowiwī ko ad. Eṃṃan bwe jen kōttāik kōj ñan E innām karijer ñan E ilo ṃōñōñō im kaṃṃoolol aolep iien.

Kajjitōk ko:

1. Ilo raan ta Jisōs ear jerkakpeje?
2. Ke kōrā ro raar etal ñan lōb eo, raar lo ta?
3. An Jisōs jerkakpeje ear kaṃool bwe E wōn?
4. Elmān ad jeļā bwe e uñ kōļļā eo an Jisōs im ejjeļok bar juon men me jej aikuj in kōļļā?
5. Ewi wāween an Jisōs kwaļok ñan lōṃaro ilo iaļ ñan Emmeōs bwe Ri Kraist ear aikuj eñtaan im mej?
6. Erri naan ko reliktata an Jisōs ñan ro rū kaļoran? Ear jiroñ er bwe ren ta?
7. Elmān ad jeļā bwe Anij e jokwane kōn mej eo an Jisōs?
8. Ke Jisōs ear wanlōñļok ñan lañ, enjel eo ear ba ta ñan ro rū kaļoran?